

- Bosna i Hercegovina. Zemlja ljubavi, poštovanja, prkosa i ponosa.

Mnogi su napisali sastave o njoj i njenoj ljepoti. Mnogi će tek napisati. Međutim, postoji jedna činjenica sa kojom vas moram suočiti. Niti jedna od tih riječi, niti jedan od tih savršeno napisanih tekstova ne može opisati Bosnu i Hercegovinu. Zna li zašto? Zato što ona nije zemlja koja se opisuje. Bosna i Hercegovina je zemlja koja se doživljava i osjeća.

Njenu ljepotu mogu osjetiti samo oni koji dušom slušaju. Sklopi oči, te u tišini oslušuj žubor naše ljepotice Bosne, koji ćeš nositi u duši čak i onda kada se udaljiš od njenog pogleda. Oslušuj milozvučni glas mujezina i let golubova sa vječno druželjubive Bašćaršije.

Pažljivo poslušaj, pa ćeš čuti i crkveno zvono u daljini, koje nikada nije smetalo glasu mujezina. Čuti ćeš vesele glasove i vrisku djece, dok razigrano trčkaraju oko lijepo Ferhadije.

Mirno, u tišini i samoći, pažljivo poslušaj. Čuješ li te tihe jecaje dok tlo pod tvojim nogama teško diše? Čuješ li bolne urlike ove zemlje krvlju natopljene? Osjetiš li, čuješ li bolan? Čuješ li bol Srebrenice, Prijedora, Foče...

Sklopi oči, te osjeti dobru dušu bosansku. Osjeti i doživi taj sevdah koji ova zemlja odiše. Osjeti ljepotu njenih planina, prostranih polja i čistih rijeka. Čuješ li, osjetiš li, ljepoticu nad ljepoticama, našu Unu? Osjećaš li ljubav ašiklija starih? Čuješ li tiha obećanja i ristanke koje je ova zemlja u sebe poput stare sehare primila? Pažljivo poslušaj, pa ćeš čuti sretne sastanke i bolne ristanke omladine naše.

Pažljivo poslušaj, pa možda u daljini začuješ bosansko kolo uz vrisku i smijeh omladine. A možda primjetiš i ispletenu čevru protkanu ljubavnom čežnjom.

Pažljivo, polako doživi moju Bosnu. Ona je godinama unazad mnogo puta povrijeđena i prevarena, pa fino postupaj sa njom. Mirno je poslušaj, a ona će tebe u svoje toplo naručje drage volje primiti.

Bosna i Hercegovina je majka čija vrpca se ne prekida nakon našeg rođenja. Ta vrpca će te vezivati za nju, čak i onda kada joj okreneš leđa, a hladnu tuđinu zamisliš boljom i ljepšom. Zar djetetu može neko od majke bolji prijatelj i zaštitnik biti? Razmisli o tome idući put kada je budeš pljuvao bez trunke kajanja i grižnje savjesti na usnama i duši.

Upozoravam te, ne posmatraj je tim dunjalučkim pogledom. Osjeti je svojom dušom i doživi je svojim srcem. Jer ono što očima vidimo je prolazno, ali ono što dušom osjetimo je vječno.

Prezime i ime: Behaderović Dženita

Škola: MSŠ Gračanica

Razred: IV4 – Ekonomski tehničar

Br. Tel. : 062/680 - 798